

DEKLARACIJA

O ZAŠTIĆENIM PODRUČJIMA U KANTONU SARAJEVO

S obzirom da su zaštićena područja u Kantonu Sarajevo i oko njega odnedavno došla na udar aktivnosti koje trajno uništavaju okoliš, privatizuju i komercijalizuju zajednička javna dobra i time lišavaju sadašnje i buduće generacije dragocjenog i za život ključnog dodira s očuvanom prirodom

izjavljujemo da su:

ZAŠTIĆENA PODRUČJA KANTONA SARAJEVO BIJAMBARE, SKAKAVAC, DARIVA, TREBEVIĆ, VRELO BOSNE

naše zajedničko blago i neprocjenjiva prirodna i društvena vrijednost, te stoga moraju biti u potpunosti očuvana i strogo zaštićena.

Od svih nadležnih - kantonalne vlade i Skupštine, općina u sastavu Kantona Sarajevo i Grada Sarajeva - traži se da:

- posvećeno i valjano rade na proširenju postojećih i proglašenju novih zaštićenih područja,
- ulažu djelotvorne napore na strogoj zaštiti i očuvanju postojećih zaštićenih područja,
- ne preduzimaju nikakve inicijative i aktivnosti koje na bilo koji način ugrožavaju zaštićena područja ili ih skrnave, privremeno ili trajno, niti takvim aktivnostima pružaju bilo kakvu podršku,
- spriječe bilo kakve pokušaje da se naruši duh jednakosti, nekomercijalnosti i netaknute prirode u zaštićenim područjima,
- zabrane i djelotvorno sprovode zabranu bilo kakve novogradnje u tim područjima, a da obnovu nekadašnjih objekata u sklopu zaštićenih područja ograniče na prvobitnu kvadraturu, gradnju prirodnim materijalima i objekte i sadržaje društvene namjene,
- smjesta obustave saradnju i bilo kakve vidove podrške privrednim subjektima, javnim institucijama i organizacijama koje svojim aktivnostima u bilo kojem zaštićenom području na teritoriji Kantona Sarajevo i van njega narušavaju prirodni okoliš,
- u skladu s globalnim trendovima područstvljavanja javnih prostora što prije pokrenu uspostavljanje mehanizama za upravljanje zaštićenim područjima koji će obuhvatiti i opštu populaciju, ali i planinarska društva, udruženja penzionera, omladinske organizacije, bicikliste, ljubitelje prirode i druge zainteresovane skupine.
- područja učine još lakše dostupnim svim stanovnicima Kantona Sarajevo.

OBRAZLOŽENJE

Deklaracija se usvaja:

imajući u vidu

- da je očuvanje prirode preduslov našeg izlaska iz klimatske i uopšte ekološke krize koja prijete našem i opstanku čitavog živog svijeta na Zemlji;

budući da su zaštićena područja:

- esencijalna za život, zdravlje i razvoj sveukupnog živog svijeta i samog čovječanstva,
- bez premca kao instrument očuvanja raznolikosti živog svijeta i bitnih staništa, te održavanja ekološke ravnoteže na planeti Zemlji,
- ključna u situaciji klimatske krize - jer doprinose jačanju otpornosti na klimatske promjene i
- od vitalnog značaja za prehrambenu sigurnost, kvalitet vode, očuvanje prirodnih resursa, suzbijanje zaraznih bolesti i nametnika, te ekonomski razvoj;

uvažavajući

- poseban značaj zaštićenih područja u neposrednoj blizini gradova, s obzirom na to da su gradovi naročito ugroženi klimatskom krizom, a zaštićena područja:
 - u velikoj mjeri jesu lako dostupna svim stanovnicima grada,
 - doprinose ublažavanju posljedica klimatske krize koje trpi gradsko stanovništvo,
 - nisu podređena profitu nego su usklađena s potrebama prirode i ljudi,
 - mnogima omogućavaju jedinstveno iskustvo dodira s prirodom bez većih izdataka i napora i
 - pomažu da se uspostavi i obnovi neposredna spona gradskog stanovništva s netaknutom ili brižljivo očuvanom prirodom;

uviđajući

- da je stanovništvo Sarajeva izloženo sve većim rizicima i pritiscima usljed bjesomučne izgradnje i uništavanja prirode s kojom kontakt biva sve nedostupniji zbog udaljenosti i troškova prevoza i boravka, te da zaštićena područja Kantona Sarajevo:
 - jesu otvorena svima podjednako i vlasništvo su zajednice a ne pojedinaca,
 - jesu većinom lako dostupna stanovništvu,
 - omogućavaju ljudima iz svih društvenih skupina boravak u prirodi bez troška - što je utoliko važnije u situaciji ubrzanog osiromašenja društva, te
 - pružaju priliku za odgoj i obrazovanje mladih u duhu poštovanja prirode.

Šta se smatra zaštićenim područjem?

Pravnim ili drugim sredstvima priznat jasno definisani geografski prostor namijenjen trajnom očuvanju prirode, kojim se upravlja sa svrhom očuvanja prirode, ekosistema i kulturnih vrijednosti.

(Prema: International Union for Conservation of Nature/ Međunarodna unija za očuvanje prirode)